



# ILIDŽA

**INFORMATIVNI BILTEN OPĆINE ILIDŽA**  
**Ilidža • April 2015 • Broj 137**





## Utvrđeni nacrti odluka o usvajanju i provođenju RP Nove Ilidže 1,2,3

Općinsko vijeće Ilidža utvrdilo je Nacrt Odluke o usvajanju Regulacionog plana „Nova Ilidža 1“, „Nova Ilidža 2“ i „Nova Ilidža 3“ i Nacrt Odluke o provođenju Regulacionog plana „Nova Ilidža 1“, „Nova Ilidža 2“ i „Nova Ilidža 3“ i uputilo ih na javnu raspravu 18.maja u Butmiru u 18. 00 sati i 19. maja u Općini Ilidža, također u 18.00 sati. Zadužena je Služba za prostorno uređenje da u saradnji sa Zavodom za planiranje razvoja Kantona Sarajevo podnese izvještaj o rezultatima javne rasprave i pripremi Prijedlog Odluke o usvajanju i provođenju Regulacionog plana „Nova Ilidža 1“, „Nova Ilidža 2“ i „Nova Ilidža 3“.



## Osnovano Javno preduzeće „Ilidža“

Općinsko vijeće Ilidža na 27. redovnoj sjednici održanoj 30. aprila 2015. godine u Multifunkcionalnoj sali donijelo je Odluku o osnivanju Javnog preduzeća za obavljanje komunalnih i drugih djelatnosti od javnog interesa Općine Ilidža.

Ovom Odlukom vrši se osnivanje Javnog preduzeća za obavljanje komunalnih i drugih djelatnosti od javnog interesa Općine Ilidža „Ilidža“ društvo sa ograničenom odgovornošću. Preduzeće se prvenstveno osniva radi ostvarivanja slijedećih ciljeva: održivog upravljanja, zaštite i održavanja dodjeljene imovine u vlasništvu Općine Ilidža i efikasnije realizacije komunalnih i drugih djelatnosti od javnog interesa u nadležnosti Općine Ilidža. Preduzeće će poslovati pod nazivom: Javno preduzeće za obavljanje komunalnih i drugih djelatnosti od javnog interesa Općine Ilidža „Ilidža“. Sjedište preduzeća je: Trg branilaca Hrasnice bb, Hrasnica, Općina Ilidža. Osnivački kapital preduzeća čine novčana sredstva u iznosu od 10.000,00 KM. Prilikom imenovanja članova Nadzornog odbora, primjenjivat će se odredbe Zakona o ministarskim, vladinim i drugim imenovanjima Federacije Bosne i Hercegovine i odredbe Zakona o sukobu interesa u institucijama vlasti Bosne i Hercegovine kao i Zakona o javnim preduzećima. Predsjednik i članovi Nadzornog odbora se imenuju istovremeno na period od četiri godine. U postupku osnivanja preduzeće će predstavljati vršilac dužnosti direktora Sead Kečo.

## Donesena odluka o neposrednoj pogodbi za prodaju neizgrađenog građevinskog zemljišta

Općinsko vijeće na svojoj sjednici održanoj 30. aprila 2015. donijelo je Odluku o neposrednoj pogodbi za prodaju neizgrađenog građevinskog zemljišta. Odlukom je odobrena prodaja neposrednom pogodbom građevinskog zemljišta u državnom vlasništvu, Fondaciji za razvoj obrazovanja Sarajevo, radi izgradnje vjerskog objekta – džamije, ulica Hrasnička cesta br. 15 (zabavni park). Fondacija za razvoj obrazovanja Sarajevo se obavezuje da nakon završetka svih građevinskih radova i stavljanja objekta džamije u funkciju isti preda Islamskoj zajednici Bosne i Hercegovine u vlasništvo kao i na upravljanje i korištenje. Naknada za nevedeno zemljište utvrđena je u iznosu od 100,00 KM/m<sup>2</sup> zemljišta. Sa kupcem nekretnine zaključit će se odgovarajući kupoprodajni ugovor u formi notarski obrađene isprave, u kojem će se regulisati međusobna prava i obaveze u pogledu kupoprodajne cijene, prenosa vlasništva i posjeda, vrijeme i način predaje nekretnine u posjed kupcu te prenos nakon izgradnje na Islamsku zajednicu BiH. Fondacija za razvoj obrazovanja Sarajevo je ponijela zahtjev odnosno iskazala interes za zemljište, radi gradnje vjerskog objekta- džamije. U zahtjevu su iskazali svoj interes za zemljište koje se nalazi preko puta glavnog ulaza u Kampus Internacionalnog univerziteta u Sarajevu i istovremeno izrazili svoju saglasnost da će zemljište nakon izgradnje džamije ustupiti u vlasništvo i posjed Islamskoj zajednici u Bosni i Hercegovini.

## Novi vijećnik Osman Đuderija položio zakletvu

S obzirom da je dosadašnjem vijećniku Elviru Kazazoviću (SDA) prestao mandat jer je stupio na dužnost ministra za obrazovanje, nauku i mlade Kantona Sarajevo, mandat vijećnika dodjeljen je Osmanu Đuderiji koji je na 27. redovnoj sjednici položio zakletvu.



## REDOVNA SJEDNICA OPĆINSKOG VIJEĆA

## U prošloj godini 1832 saobraćajne nesreće

Na sjednici Vijeća bila je i Informacija o stanju kriminaliteta, javnog reda i mira i saobraćaja na području općine Ilidža za period januar-decembar 2014. godine. U ovom izvještajnom periodu došlo je do povećanja broja izvršenih krivičnih djela za 164 djela više u odnosu na isti period 2013. godine, dok je za 16 slučajeva smanjen broj prekršaja iz oblasti javnog reda i mira. U Izvještaju Četvrte policijske uprave u toku 2014. godine bilo je 1832 saobraćajne nezgode 6248 izdatih prekršajnih naloga i zahtjeva za pokretanje prekršajnih postupaka iz oblasti saobraćaja.

Vijeće je na sjednici primilo k znanju i informacije o zimskom održavanju cesta na području općine Ilidža za period 15. novembar 2014. do 15. mart 2015 godine, o provođenju Zakona o pravima branilaca i članova njihovih porodica i Zakona o posebnim pravima dobitnika ratnih priznanja i odlikovanja i članova njihovih porodica, o praćenju stanja ugroženosti od poplava na svim rizičnim područjima općine i informaciju Komisije za boračka pitanja, rad, zdravstvo i socijalnu politiku o realizaciji zaključka Vijeća za izradu unificiranog obrasca za podnošenje izvještaja o radu i materijalno-finansijskom poslovanju boračkih udruženja općine Ilidža.

## Usvojen Izvještaj o realizaciji Programa razvoja zaštite i spašavanja od prirodnih i drugih nesreća

Općinsko vijeće usvojilo je Izvještaj komisije o realizaciji Programa razvoja zaštite i spašavanja ljudi i materijalnih dobara od prirodnih i drugih nesreća Općine Ilidža za period od 2011. do 2014. godine. Program razvoja zaštite i spašavanja ljudi i materijalnih dobara od prirodnih i drugih nesreća je dokument općeg značaja bez posebnih pojedinosti i konkretizacije i ima tri glavna dijela. Prvi dio se odnosi na politiku razvoja zaštite i spašavanja. To je okvirni dokumenti koji određuje opredjeljenja i pravce i opće okvire za izradu temeljnih dokumenata programa razvoja za razdoblje za koji se taj program donosi, a to je razdoblje najmanje od pet godina. U tom pogledu politika razvoja obuhvata viziju razvoja, ciljeve razvoja, temeljna načela i opredjeljenja i područja razvoja sistema zaštite i spašavanja. Drugi dio odnosi se na strateške pravce razvoja zaštite i spašavanja, a koji se zasnivaju na viziji i ciljevima određenim u politici razvoja. Treći dio odnosi se na posebne dokumente o stanju zaštite i spašavanja koje postoje u vrijeme kada se program donosi. U protekle četiri godine Služba civilne zaštite je u saradnji sa drugim službama Općine intenzivno provodila mjere zaštite i spašavanja kao organizovane radnje i postupke preventivne i operativne prirode.

## Prijedlozi akata o regulisanju imovinsko-pravnih odnosa

Vijeće je usvojilo prijedlog akata o regulisanju imovinsko-pravnih odnosa i to prijedloge rješenja o rješavanju imovinsko-pravnih odnosa u svrhu legalizacije stambenih objekata po zahtjevima Aleta Merseda, Fejzić Reufa, Isović Munira, Čubrilo Blagoja, Hasibović Sejada, Čubrilo Branka i Hrustanović Derviša. Usvojeni su i prijedlozi rješenja o rješavanju imovinsko-pravnih odnosa u svrhu legalizacije poslovnih objekata po zahtjevima Dacić Elmaza, Mujanović Rahmana i Prevljak Fikreta i prijedlog rješenja o utvrđivanju prava vlasništva na građevinskom zemljištu Camović Emina, te prijedlog rješenja u svrhu legalizacije pomoćnog objekta po zahtjevu Mešić Mede. Također je usvojen prijedlog rješenja o rješavanju imovinsko-pravnih odnosa u svrhu dodjele gradsko-građevinskog zemljišta Ikić Hamde.



## Imenovani novi članovi komisija

Vijeće je na prijedlog OO SDA Ilidža za člana Komisije za planiranje općinskog razvoja imenovalo Aidu Kešo, umjesto Nermine Mehić, koju je Vijeće razrješilo dužnosti, kao i Elvira Kazazovića s mjesta predsjednika Komisije za planiranje općinskog razvoja, mjesne zajednice, komunalne poslove i ekologiju, a imenovalo Mirsada Hošića. Općinsko vijeće je razrješilo i člana Općinske izborne komisije Ilidža, Mirhetu Halilović zbog isteka mandata.

## Sandin Arnautović predsjednik Radne grupe za realizaciju projekta SFF

Vijeće je imenovalo Sandina Arnautovića za predsjednika Radne grupe za realizaciju projekta Sarajevo Film Festival umjesto Denisa Muhovića koji je razriješen dužnosti na lični zahtjev.



## Održana javna rasprava o Strategiji razvoja Općine Ilidža za 2014-2020.

U Multifunkcionalnoj sali Općine Ilidža 23. aprila 2015. godine održana je javna rasprava o Nacrtu Strategije razvoja Općine Ilidže za period 2014-2020. i o Nacrtu Akcionog plana za realizaciju Strategije razvoja općine za 2015. godine.

Općina Ilidža je u proteklom periodu pripremila dokument „Nacrt Strategije razvoja općine Ilidža 2014.-2020.“ U pripremi ovog dokumenta aktivno su radili Radna grupe za izradu Strategije, Komisija za planiranje općinskog razvoja, te Konsultantski tim koji je imenovan od strane općine Ilidža.

„Vodeća načela na kojima se zasniva planiranje lokalnog razvoja jesu održivost i socijalna uključenost. Načelo održivosti podrazumjeva integrisanost najvažnijih ekonomskih, društvenih i okolišnih aspekata, a zasniva se na ideji da prirodni i ljudski sistemi moraju biti regenerativni (obnovljivi) i uravnoteženi da bi trajali. Ostvarivanjem ovoga načela doprinosi se ujednačavanju šansi u razvoju i povećanju društvene pravičnosti. Strategija razvoja Općine Ilidža se radi do 2020. godine što je usklađeno sa evropskom dinamikom planiranja. To obezbjeđuje i apliciranje prema sredstvima EU fondova obzirom na usklađenost ciljeva koji doprinose razvoju lokalne zajednice i bržem putu naše zemlje prema EU, a želja nam je da dokument bude po mjeri svih građana“ rekao je, između ostalog, Haris Gudić, koordinator Radne grupe za izradu Strategije.

Učesnici u javnoj raspravi davali su prijedloge i sugestije kako bi Strategija bila što sveobuhvatniji dokument. Najvažnije snage Općine uključuju njen prepoznatljiv identitet, bogatstvo kulturno-historijskog i prirodnog nasljeđa, prirodni kapital – vode (pitke, termalne, mineralne) i očuvan okoliš i prostor za razvoj turizma (Vrelo Bosne, Aleja, Igman, banjska liječilišta, rekreacione zone i šetališta). Posebna snaga Općine je njen povoljan geoprometni položaj i dobar saobraćajna povezanost svih vidova transporta (cestovni, autoput, aerodrom). Stanovništvo Općine ima trend stalnog rasta i izražene vitalne karakteristike. Obrazovanju stanovništva izuzetno doprinose i centri visokodiferenciranih međunarodnih studija, prepoznatljivih u široj regiji. Tako čovjek sa svim svojim karakteristikama postaje najvažniji faktor i akter razvoja Općine. Nesumnjivo da su značajne interne snage stabilna općinska vlast koja obezbjeđuje javni servis dostupan svima, prepoznaje potrebe i interese svojih građana i usmjerava razvoj Općine uvažavajući proaktivno djelovanje njenih građana, ali istovremeno ulaže u povoljan poslovni ambijent i partnerstvo za ekonomski napredak.

## Potpisani ugovori za dodjelu 20 plastenika

Općina Ilidža kontinuirano podržava razvoj primarne poljoprivredne proizvodnje. Na osnovu Pravilnika o utvrđivanju uslova, kriterija i postupaka za ostvarivanje prava na dodjelu, a u okviru realizacije projekta „Dodjela plastenika u općini Ilidža“ i ove godine je organizovana dodjela plastenika. Na prijedlog komisije, općinski načelnik je donio odluku o dodjeli plastenika za 20 osoba, površine 100 kvadratnih metara sa kompletnom opremom čija pojedinačna vrijednost iznosi oko 3000 KM. U sali Općine Ilidža 7. aprila 2015. godine, korisnicima su uručeni ugovori o dodjeli i isporuci plastenika. Ovo je nastavak projekta dodjele iz 2014. godine, a uskoro će se podijeliti još 45 plastenika za 2015. godinu.

„Politika Općine Ilidža je da je ljudima pomože na ovaj način, da im omogućimo da svojim radom prizvede hranu za svoje potrebe, a da ostvare i dodatni prihod, te smatramo da je ovo ulaganje u poljoprivredu korisnije nego neki drugi vid pomoći. Ovo je naša pomoć i obaveza prema ljudima koji su u stanju socijalne potrebe i neka vam je sa srećom“, kazao je načelnik Općine Ilidža prof. dr. Senaid Memić u svom obračanju dobitnicima plastenika.

Općina Ilidža je za podršku razvoju poljoprivrede i pomoći svojim stanovnicima u ovoj godini, pored plastenika podijelila i 2700 sadnica voća, a u planu je i podjela sadnog materijala.



## Rekonstrukcija Trga oteškog bataljona

Na području općine Ilidža, tačnije u MZ Otes, započela je rekonstrukcija trga u ulici Trg oteškog bataljona.

Investitor je Općina Ilidža, a izvođač radova fima „Mevludin comerc.“ Vrijednost radova iznosi 100.000 KM. Radovi bi trebali biti završeni do kraja mjeseca.





## Rekonstrukcija ulice Igmanska cesta

**K**ako je nastupilo ljepše vrijeme tako su na području Općine Ilidža i aktivirani radovi na rekonstrukciji ulice Igmanska cesta i izgradnji pješačkih staza.

Izvođač radova je firma "Sarajevoputevi d.d." Investitor je Općina Ilidža, a vrijednost je 100.000 KM Dužina saobraćajnice u ovom projektu iznosi 220 metara.



## Četvrta faza izgradnje saobraćajnice uz Željeznicu

**Z**apočela je četvrta faza nastavka izgradnje saobraćajnice uzvodno obalom rijeke Željeznice od mosta Alije Izetbegovića do ratnog mosta u Sokolović-Koloniji. Radit će se dužina oko 237 metara.

Izvođač građevinskih radova je firma Mevludin Comerc sa ugovorenim iznosom 279.157,90 KM, a izvođač za javnu rasvjetu je Testingelektro d.o.o sa ugovornim iznosom 28.714,88 KM.

Rok izvođenja radova je 12 mjeseci. Saobraćajnica će imati dvije trake širine šest metara, obostrani zeleni pojas širine jednog metra i obostrane pješačke staze 2,5 metara, kao i bankine 0,5 metara.

## Novi asfalt u tri ulice

**N**a području općine Ilidža započela je rekonstrukcija tri ulice i to Grabovine, Vreoca i Tuneli.

U MZ Blažuj gdje se nalazi ulica Grabovine asfaltirat će se dužina od 350 metara. Izvođač radova je MG BH d.o.o Sarajevo. Vrijednost radova je 35.000 KM a finansira ih Općina Ilidža.

U MZ Vreoca u toku su radovi u ulici Vreoca u dužini od 180 metara. Radovi u iznosu 20.000 KM su povjereni firmi Sarajevoputevi d.d Sarajevo, a finansira ih Općina Ilidža.

Ulica Tuneli u MZ Donji Kotorac dobit će novi asfalt u dužini od 220 metara. Radove izvode Mevludin Comerc d.o.o u vrijednosti 30.000 KM, a finansira ih Općina Ilidža.



## Iz Budžeta izdvojeno 66.500 KM za socijalno najugroženija lica, a 42.000 KM za liječenje teško oboljelih lica

**O**pćina Ilidža je u ovoj godini dodjelila 42.000 KM za participaciju u liječenju teško oboljelih lica sa područja ove općine.

Na prvoj sjednici Komisije za rješavanje zahtjeva za dodjelu novčane pomoći teško oboljelih lica dodjeljeno je 12.000 KM za osam lica, a na drugoj 30.000 KM za njih 15.

Od početka godine pa do 17. aprila 2015. godine iz Budžeta Općine Ilidža dodjeljeno je 66.500 KM kao pomoć socijalno najugroženijim licima. Komisija za dodjelu novčanih pomoći socijalno najugroženijim licima 20. januara riješila je zahtjeve 90 lica i dodjeljeno je 13.050 KM, 13. februara također 90 i isplaćeno je 12.500 KM, 5. marta 76 korisnika, 10.600 KM, 27. marta 86 korisnika 14.500 KM i danas 105 korisnika za koje će biti isplaćeno 16.300 KM.



## Deminiranje Lovačke okuke 2

**D**eminiranje projekta Lovačke okuke 2 na području MZ Hrasnice 1 dionica prema Bjelašnici započela je 22. aprila 2015. godine.

Deminirat će se 77.604 kvadratna metra. Projekat zajednički finansiraju Općina Ilidža i Međunarodni fond ITF. Izvođač radova Prov-Vita Mostar. Vrijednost radova je oko 90.000 KM.

Obavještavaju se građani da će zbog blizine deminiranja biti polučasovna obustava saobraćaja 5-7 dana. Poslije svakog polusatnog deminiranja puštat će se saobraćaj 15 minuta. Obustave počinju u 9,15 i trajat će do 15, 15 sati, a nakon toga bit će slobodan saobraćaj.

Za dane vikenda neće biti obustave saobraćaja. Mole se građani na strpljene i razumijevanje.

## Ilidža nastavlja sa svojom vizijom

**U** Općini Ilidža 24. aprila održan je sastanak rukovodstva radi preispitivanja prikladnosti, adekvatnosti i efikasnosti upravljanja sistema kvalitetom i okolinom.

Cilj preispitivanja je bio uočiti područja u kojima su moguća, odnosno nužna poboljšanja pružanja usluga korisnicima.

PR za ISO standard Mirsada Hadžić, rekla je da će Općina Ilidža i dalje nastaviti svoju viziju efikasne administracije, ekonomski jake s velikim brojem zaposlenog stanovništva, dobro riješenu infrastrukturu, razvijen turizam, kvalitetnu zdravstvenu i socijalnu zaštitu, uređen obrazovni sistem, bogat kulturni i sportski život u okviru ekološki očuvane cjeline.

Općina Ilidža nastavit će, da radi na osiguranju efikasnog rada organa uprave i kvalitetnom pružanju usluga građanima, ispunjavat će zadatke u skladu sa zakonom uz poštivanje i zaštitu osnovnih ljudskih prava i sloboda i zaštitu okoline.



## Završeno deminiranje "Vrelo Bosne-Golo brdo"

**N**a području općine Ilidža 10. aprila 2015. godine završen je projekat deminiranja Vrelo Bosne-Golo brdo.

"Deminirana je površina od 77.486 kvadratnih metara. Izvođač radova je bila firma Udruženje za eliminaciju mina UEM Sarajevo, a finansijeri su Općina Ilidža i ITF-Fond. Općina Ilidža je za projekte deminiranja u 2014. godine izdvojila 200.000 KM, a američka vlada putem Fonda ITF 100.000 KM", rekao nam je Rifet Hodžić, koordinator za deminiranje u Općini Ilidža.

"Na zadatku deminiranja ovog područja bilo je angažovano 20 deminera. Projektom dokumentacijom je bila predviđena metoda pregiranja, međutim zbog nagiba terena i gustoće i visine vegetacije nije primjenjena već manuelna metoda. Nismo pronašli ništa od minsko eksplozivnih sredstava i ovaj teren je za izletnike i građane čist od mina," izjavio je Salko Osmanspahić, oficir za osiguravanje kvaliteta.

## Održana ekološka akcija u Sokolović-Koloniji

**P**ovodom 22. aprila Dana mjesne zajednice Sokolović-Kolonija i Dana planete zemlje 19. aprila izvedena je ekološka akcija čišćenja lijeve obale rijeke Željeznice od mosta Alije Izetbegovića, prema ratnom mostu, a očišćen je i plato kod centralne džamije.

Ovoj akciji odazvali su se građani MZ Sokolović-Kolonija, članovi ekološke sekcije Pete osnovne škole i KJKP "Rad" članovi Savjeta MZ i pojedini vijećnici i predstavnici Općine.

"Ovo je druga akcija koju organizira Savjet MZ. Građani Sokolović-Kolonije trebaju kontinuirano raditi sa Općinom Ilidža kako bi se unaprijedila ekološka svijest sviju nas" rekao nam je Enes Čorbo, šef Službe za koordinaciju rada MZ Općine Ilidža.





## Dan kada je odbranjena Ilidža

U organizaciji Patriotske lige Ilidža, Udruženja Četvrte viteške motorizovane brigade i Općine Ilidža, 22. aprila 2015. godine ispred Pete osnovne škole u Sokolović- Koloniji održan je tradicionalni memorijalno-historijski susret pod nazivom „Dani odbrane Ilidže“.

U prisustvu velikog broja građana, delegacije Općine Ilidža, udruženja boraca, političkih stranaka, rodbine i prijatelja položile su cvijeće ispred spomen-obilježja i učenjem Fatihe, minutom šutnje odali počast šehidima, poginulim borcima i civilnim žrtvama rata.

Načelnik Općine Ilidža prof. dr. Senaid Memić u svom obraćanju prisutnim istakao je dug i obavezu prema poginulim, da se ne smiju zaboraviti i da nisu uzalud dali svoje živote kako bi mi danas živjeli slobodni. Ovo mjesto i ovaj datum su najznačajniji u odbrani ne samo Ilidže već i cijele Bosne i Hercegovine.

Komandant i učesnik ove sudbonosne bitke general Fikret Prevljak kazao je da su se borci hrabro suprostavili tadašnjoj četvrtoj vojnoj sili u Evropi izdajničkoj JNA.

„Danas smo tu da obilježimo ovaj dan kada su pripadnici Patriotske lige, Teritorijalne odbrane, pripadnici policije i Specijalnog odreda MUP-a, te samoorganizovani građani stali u odbranu ovih prostora i krenuli u oslobađanje zaposednutih teritorija od strane neprijatelja i kada su im nanoseni veliki gubitci“, kazao je Prevljak.

U okviru obilježavanja ovog značajnog datuma položeno je cvijeće na Centralno spomen-obilježje ispred zgrade Općine Ilidža i ispred Ratne bolnice „Čamil Marić“ u Hrasnici, a održan je i turnir u malom nogometu osnovnih škola sa područja Ilidže, turnir u strljaštvu veterana i takmičenje u prvoj pomoći učenika osnovnih škola. Ovaj dan je i Dan mjesne zajednice Sokolović- Kolonije. Učenici Pete osnovne škole izveli su prigodan program.

## Dan oslobođenja Sarajeva

U organizaciji Udruženja antifašista i boraca narodnooslobodilačkog rata Ilidža polaganjem cvijeća u Velikom parku na Ilidži obilježen je 6. april, jubilej 70-te godišnjice oslobođenja grada Sarajeva.

„Mi smo se danas 6. aprila okupili ovdje pored spomen kosturnice na čijim pločama je uklesano 99 imena, poginulih boraca Ilidžanaca u NOB-a da im odamo počast. Međutim, borba protiv fašizma traje i danas. Mlade generacije moraju slušati časove historije kako bi bili upoznati i kako se ne bi zaboravilo šta se ovdje dešavalo 1940 -1945. kao i 1992-1995. “ rekao nam je Nikola Babić, predsjednik Upravnog odbora UABNOR-a Ilidža.

Šesti april najznačajniji je datum u historiji Sarajeva. To je dan kada je Sarajevo oslobođeno od fašističke okupacije tokom Drugog svjetskog rata, ali i dan koji simbolizuje



## Godišnjica DIO "Fikro"

U organizaciji Udruženja Četvrte viteške motorizovane brigade Ilidža, 9. aprila 2015. obilježena je godišnjica formiranja Diverzantskog odreda "Fikro".

Delegacije koje je predvodio njihov nekadašnji komandant Fikret Prevljak položile su cvijeće u parku Hrasnica na stećak DIO "Fikro" i mezarja Emira Bogunića-Čarlija i Ejuba Sarajkića-Eke.

Za učenike osnovce historijski čas održao je Admir Mulaosmanović istoričar i nekadašnji pripadnik diverzanata.

„Najznačajniji period mog života i nešto što me je obilježilo čitav život i dalo mi epitet, jest moje pripadanje ovom odredu. U tom periodu velika obaveza je bila stati u odbranu naše zemlje. Sa nekoliko pušaka i metaka, u starkama i farmerkama, okupili smo se kako bi se suprotstavili daleko brojnijem i moćnijem neprijatelju. Danas sam ponosan što sam bio pripadnik Diverzantskog odreda "Fikro". Nukleus odbrane Ilidže, odnosno Butmira, Sokolović-Kolonije i Hrasnice su bili diverzanti ovog odreda, koji su životima branili svoje domove, majke, kćerke, sinove, supruge, komšije. Mogu reći i da su bili nukleus odbrane Sarajeva“ kazao je osnovcima Admir Mulaosmanović.

Ko je pobjedio u ovom ratu? pitao je Admir Mulaosmanović osnovce.

„Sam opstanak Bosne i Bošnjackog naroda je pobjeda. Tu pobjedu obezbjedili su ovi ljudi ovdje, vaši očevi, djedovi, komšije i ne zaboravite da su pripadnici DIO "Fikro" historija svih nas “ dodao je Mulaosmanović.

Delegacije su položile cvijeće i odale počast poginulima na mezarju Kovači-Hrasnice gdje su proučeni Jasini i dove šehidima, a u bazenu RVI upriličeno je druženje nekadašnjih diverzanata i evociranje uspomena, koje kako su poručili sa ovog skupa, živjet će koliko i njihovi potomci.

početak opsade Sarajeva u proteklom ratu u BiH. Zbog toga se 6. april obilježava kao dan oslobođenja grada u Drugom svjetskom ratu i kao Dan grada.





## Obilježena godišnjica pogibije Ivana Stanića Čićija

U organizaciji Općine Ilidža i Udruge umirovljenika i demobiliziranih branitelja HVO-a Ilidža 12. aprila kod spomen-obilježja u Azićima položen je vijenac i zapaljena svijeća velikom heroju, Ivanu Staniću-Čićiju, zlatnom ljiljanu.

„Danas smo se okupili na dan pogibije našeg Ivana Stanića Čićija koji je bio nevjerovatno hrabar borac. On je uvijek išao ispred svih nas tako da nije bilo teško pratiti takvog čovjeka koji je dao život za BiH. Mi obećavamo, njegovi saborci da nećemo dopustiti da se on ikad zaboravi” kazao nam je Žarko Ljubas, nekadašnji Čićijev suborac.



## Nova radna mjesta za ratne vojne invalide

Ugovor o finansiranju/sufinansiranju programa i projekata kantonalnih i drugih boračkih udruženja potpisali su 22. aprila 2015. u prostorijama bazena RVI ministar za boračka pitanja Kantona Sarajevo Muharem Fišo i predsjednik Udruženja ratnih vojnih invalida Općine Ilidža Esad Delić.

„Na osnovu Ugovora, Ministarstvo za boračka pitanja KS će ovom udruženju doznačiti 10.000,00 KM kao podsticaj zapošljavanju nekoliko ratnih vojnih invalida, članova ovog udruženja, te za potrebe registriranja boračke zadruge“ rekao je ministar Fišo, te najavio da će ratni vojni invalidi dobiti stalno zaposlenje u suvenirnici Tunela Dobrinja-Butmir.

Esad Delić, predsjednik RVI Ilidža se zahvalio Ministarstvu za boračka pitanja na razumijevanju potreba ove populacije ali i na podršci projektima koje u ovom udruženju uspješno realiziraju.

„Posebno smo zahvalni na kreditnim sredstvima u iznosu od 120.000,00 koja su krajem prošle godine odobrena firmi „Izvor Bosne“, a čiji je osnivač naše udruženje. Pomoću tih sredstava planiramo renovirati objekt restorana na Bazenima Ilidža i izgraditi 20 apartmana gdje ćemo uposliti još najmanje 10 ratnih vojnih invalida“, izjavio je Delić.

Kako je rekao Delić firma „Izvor Bosne“ uspješno posluje i trenutno upošljava 20 ratnih vojnih invalida koji rade u restoranu i na bazenima, te kao inkasanti na nekoliko parking lokacija na Ilidži.



## Hrabro poginuo

U organizaciji Općine Ilidža i Udruženja organizatora otpora veterana rata, dobrovoljaca, prvoboraca i branilaca „Zelene beretke“, 3. aprila 2015. godine u prisustvu rodbine, prijatelja, saboraca, predstavnika boračkih udruženja i Općine, obilježena je godišnjica pogibije šehida Hajrudina Klepe. Članovi porodice Hajrudina Klepe, delegacije Općine, Zelenih beretki, Četvrte viteške brigade i UABNOR-a položili su cvijeće na mezar i kod mjesto pogibije na spomen-obilježje i proučili Fatihu i odali počast ovom šehidu.

„Rahmetli Hajrudin se među prvima priključio Zelenim beretkama i aktivno se uključio u akciju izuzimanja oružja i MTS-a iz baze u Krtelju. Prilikom jednog od mnogobrojnih ulazaka u bazu u pokušaju da osposobi transporter, hrabro je poginuo od snajperskog hica“, kazao je u svom obraćanju Fikret Delić, nosilac „Zlatnog ljiljana“ i neposredni učesnik ove akcije.

Prigodan program izveli su članovi Udruženja za djecu i mlade NOMINATIV.



## Parcele za proljetnu sjetvu

Ove, kao i predhodnih godina, Udruženje demobilisanih branilaca 92-95, 15. aprila 2015. godine u hrasničkom polju, organizovalo je podjelu zemljišnih parcela za proljetnu sjetvu za 40 socijalno ugroženih i ostalih pripadnika boračkih udruženja sa područja općine Ilidža. Sve parcele su uzorane i isfrezane, a dobili su od 300 do 900 kvadratnih metara zemlje prema iskazanim potrebama. Ovo je još jedna od akcija pomoći demobilisanim borcima koji su u stanju socijalne potrebe, a parcele za proljetnu sjetvu ovo udruženje pripadnicima boračke populacije dijeli 16 godina zaredom.





## Skolski bazar u Drugoj osnovnoj školi

Već drugu godinu zaredom Druga osnovna škola organizuje Školski bazar koji je ove godine održan 24. aprila 2015 godine u prostorijama škole, a u čijoj realizaciji su učestvovali učenici, roditelji, privrednici, Vijeće roditelja, uposlenici i menadžment škole. Učenici su zajedno sa nastavnicima izložili svoje kreacije koje su radili na sekcijama tokom godine, a roditelji svoje prehrambene proizvode. Bazar je bio prodajnog karaktera. Jedan dio ostvarenog prihoda od prodaje izloženih artikla ići će u humanitarne svrhe, a jedan za potrebe učenika i škole.

Cilj projekta je da se učenici, nastavnici, roditelji i stanovnici naselja kroz kreativan i human rad druže i zabave što najbolje govori slogan ovogodišnjeg Bazara „Školski bazar nas veseli, neka kupi ko šta želi“.



## Četvrta osnovna najbolja iz matematike

Dvadeseto općinsko takmičenje iz matematike održano je 11. aprila u Osmoj osnovnoj školi „Amer Čenanović“. U kategoriji sedmih razreda pobijedio je Mirza Karić iz Šeste osnovne škole, drugo mjesto Asija Fazlić iz Pete osnovne škole, a treće Zehra Grbović iz Osnovne škole El-Manar. Emina Zolota iz Osme osnovne škole „Amer Čenanović“ najbolja je matematičarka osmih razreda, druga je Nejra Dedović također iz Osme osnovne škole „Amer Čenanović“, a treće Kemal Hadžabdić iz Druge osnovne škole. U kategoriji devetih razreda tri učenika osvojila su maksimalan broj bodova i podijeli prvo mjesto. To su Ilma Husić iz Desete, Lejla Skelić iz Četvrte i Elma Leka iz Druge osnovne škole. Drugo mjesto pripalo je Larisi Džambić a treće Aidi Vejo, obje iz Pete osnovne škole. Za prvo mjesto obezbijedena je nagrada od 100 KM drugo 80 KM a treće 60 KM.

Ekipno najveći broj bodova imala je Četvrta osnovna škola, drugo mjesto Druga a treće Peta osnovna škola.

## Učenici pošumljavaju svoju MZ

Pošumljavanje je najvažniji i najjeftiniji način da se životna sredina održi kvalitetnom. Tako su učenici Devete osnovne škole u okviru projekta „Civitas“ 15. aprila započeli pošumljavanje Rakovice. Njih 90-tak zasadit će 500 sadnica na lokalitetu Zenika. Sadnice je obezbijedila firma „Sarajevošume.“

U realizaciji ovog projekta pored učenika Devete osnovne škole uključili su se i članovi „Odrred izviđača Rakovica 9“.

„Mislim da je ovo kvalitetan projekat. Osim što ćemo pomoći našoj MZ mi ćemo se i družiti i upoznavati jedni druge“ rekla je učenica Adna Rahman.

„U osnovnoj školi se može veoma uspješno djelovati na razvoj ekoloških navika i svijesti učenika sa refleksijom na lokalnu društvenu zajednicu. Ovaj projekat je pravi primjer i ponosna sam na ove učenike“ izjavila je direktorica škole Nermina Budnjo.



## Dani otvorenih vrata u Spjalici

Obrazovno-raznodni centar za mlade Spjalica 17. aprila 2015. organizovao je Dan otvorenih vrata, gdje su došli osnovci sa prostora općine Ilidža, učenici sedmih, osmih i devetih razreda.

Obzirom da se bliži kraj školske godine tj. da dolazi eksterna matura gosti su upoznati sa programom instruktivne nastave za eksternu maturu koji će se odvijati u Spjalici tokom mjeseca maja. Osnovci su čuli i o volonterskom radu, neformalnom obrazovanju, a ujedno je ovo bila prilika za dobru zabavu i druženje.

„Dan otvorenih vrata odlična je prilika da se mladi druže, uče, ali i saznaju kakvu ponudu aktivnosti nudi Centar i kako kreativno mogu upotrijebiti svoje slobodno vrijeme. Za nastavnike i profesore Dan otvorenih vrata u Spjalici dobra je prilika da otkriju načine na koje neformalno obrazovanje može nadopuniti formalno. Program je bio edukativan i trajao je dva sata,“ rekla nam je Selma Suljević koordinatorka u Spjalici. Ovaj projekat je finansijski podržala Oćina Ilidža putem Strategije za mlade.





## Tehničari Druge osnovne škole najbolji

**D**omaćin 16. Smotre naučno-tehničkog stvaralašta mladih Ilidže, koje je održano 4. aprila 2015. godine bila je Druga osnovna škola. Na takmičenju su učestvovali učenici iz 11 osnovnih škola sa područja općine Ilidža. Svaku školu predstavljalo je najmanje po pet učenika. Prvo mjesto osvojili su tehničari Druge osnovne škole koju su predstavljali Gadžo Medina, Pamuk Azra, Kovač Maida, Hasečić Armin i Hasković Irma. Drugo mjesto pripalo je ekipi Devete osnovne škole za koju su se takmičili Karić Berina, Mulaosmanović Kenan, Aleksić Azra, Bajrica Adna i Musić Alma, dok je trećeplasirana Sedma osnovna škola i njeni učenici Kurtagić Adna, Lisić Almina, Šuša Bakir, Kadušić Arijana i Omerović Amina. Pobjednicima su uručene diplome.



## Treća tradicionalna ulična trka „Amer Čenanović“

**P**rvog aprila 2015. godine navršile su se četiri godine od prerane smrti načelnika Općine Ilidža Amera Čenanovića. Tim povodom u znak sjećanja na ovog velikog i plemenitog čovjeka treću godinu zaredom održana je ulična trka „Amer Čenanović“.

U trci dužine oko tri kilometra, koju je organizovala Općina Ilidža, učestvovalo je 400 učenika osnovnih škola sa područja Ilidže i srednjih škola sa područja Ilidže i Hadžića.

Prvo mjesto među djevojčicama osnovnih škola osvojila je Adelisa Hromo iz Sedme osnovne škole, drugo Ilma Rahmanović iz Desete osnovne škole i treće Džana Čišić. U kategoriji dječaka prvi kroz cilj prošao je Kenanan Bećirević iz Devete osnovne škole, drugi Kerim Kolić iz Prve i treći Ajdin Jusupović iz Desete osnovne škole. Od srednjoškolkki prva je bila Lamija Palalija iz Četvrte gimnazije, druga Ema Hasibović-Galijašević iz Srednje škole grafičkih tehnologija, dizajna i multimedija i treća Aida Fisović iz Srednješkolskog centra iz Hadžića.

Prvo mjesto u kategoriji učenika srednjih škola osvojio je Alija Imamović iz Srednješkolskog centra iz Hadžića, drugo Kosta Šumar iz Srednješkolskog centra Pale i treće Ervin Mešanović iz Srednješkolskog centra iz Hadžića.

Nagrade i zahvalnice pobjednicima je uručio načelnik Općine Ilidža prof. dr. Senaid Memić.

„Ovo je najboljih načina da se prisjetimo i pamtimo ovog velikog čovjeka i da zajedno radimo na budućnosti kakvu je on gradio i želio. Svi koji su stigli na cilj su pobjednici. Djeca iz Bosne i Hercegovine imaju zdrav genetski materijal i ne treba da brinu za svoju budućnost“, poručio je učesnicima trke načelnik Memić.



## Obilježena godišnjica smrti Amera Čenanovića

**P**rije četiri godine, prvog aprila 2011. godine prestalo je da kuca srce velikog čovjeka, našeg komšije, prijatelja, našeg načelnika Općine Ilidža Amera Čenanovića. Tim povodom učenici i nastavnici Osme osnovne škole „Amer Čenanović“ i članovi Gorske službe spašavanja i Streljačkog kluba „Ilidža“ učenjem Fatihe i polaganjem cvijeća obilježili su godišnjicu od Amerove smrti i još jednom se podsjetili na njegov plemeniti lik i njegov nemjerljiv doprinos u razvoju općine Ilidža, tužni što ga više nema, a ponosni i zahvalni što su ga poznavali i imali.

## Ekipe Prve osnovne škole drugo, a Grafičke škole treće mjesto u pružanju prve pomoći

**O**pćinu Ilidža i Crveni križ općine Ilidža na kantonalnom takmičenju iz pružanja prve pomoći 25. aprila 2015. u Ilijašu su predstavljale ekipa Srednje tehničke škole grafičkih tehnologija, dizajna i multimedije, u kategoriji omladine i ekipa Prve osnovne škole, u ekipi podmlatka. Takmičenje je održano po kružnom sistemu na poligonima na kojima su imitirane situacije sa više povrijeđenih kao u realnim događajima. U kategoriji omladine Srednja tehničke škole grafičkih tehnologija, dizajna i multimedije ekipa je osvojila treće mjesto, a u ekipi podmlatka, drugo mjesto.





## Basket cup 2015.

**P**od pokroviteljstvom Općine Ilidža a u organizaciji KK "Impuls" je u periodu od 02. do 05. aprila 2015.godine uspješno realizovao turnir BASKET CUP 2015. - Treći međunarodni turnir u košarci za mlađe kategorije, dječake i djevojčice od 12 do 16 godina.

Na turniru je učestvovalo 40 ekipa sa više od 500 košarkaša i košarkašica iz Slovenije, Crne Gore i Bosne i Hercegovine. U prvom dijelu takmičenja odigrano je 70 utakmica u grupnoj fazi a u nastavku trećeg takmičarskog dana odigrano je još 20 utakmica za plasman i polufinala i finala po kategorijama. Odigrano je ukupno 90 utakmica i dodjeljene su nagrade u šest kategorija. Kategorija U 13 dječaci prvo mjesto pripalo je AS Herceg Novi CG, drugo Stražišće Kranj SLO, i treće Ježica Ljubljana SLO. U 14 dječaci : pobjednik je Real Way Sarajevo BiH, Bosna Sarajevo BiH druga i treći Spars Sarajevo BiH. U 16 dječaci kategoriji najbolji rezultat imao je Real Way Sarajevo BiH, drugi Ježica Ljubljana SLO i Bosna Sarajevo BiH treći. U 13 djevojčice prvi Triglav Kranj SLO, Igman Istočna Ilidža BiH drugi , te treći Konjic BiH. U 14 djevojčice prvi su bili Brčanka Brčko drugi Igman Istočna Ilidža, a treći Winner Zenica BiH. U 16 djevojčice pobjednik kategorije je Stražišće Kranj SLO, Mladost Gacko drugi i Konjic BiH treće mjesto.



## Treći tradicionalni turnir u stonom tenisu

**S**tono-teniski klub "Ilidža" je povodom Dana MZ Stupsko brdo organizirao Treći tradicionalni turnir u stonom tenisu u tri starosne kategorije, predpioniri, pioniri i seniori. Turnir je uz prisustvo 60-tak takmičara otvorio dopredsjedavajući Općinskog vijeća Ilidža Suljo Alić. Predsjednik Upravnog odbora ovog kluba Džemal Habibija je izrazio zahvalnost svim strukturama vlasti Općine Ilidža bez čije bi podrške ove i slične manifestacije bilo nemoguće realizirati.

Prvo mjesto u kategoriji predpionira osvojio je Fejsal Habibija, drugo Tin Kapetanović, a treće mjesto je osvojio Ajdin Dikonja. U kategoriji pionira prvi je bio Ervin Vladić, drugo mjesto Kenan Sejfović, a treći Dženan Rizvanović. U kategoriji seniora prvo mjesto osvojio je Adis Omerović, drugo Adnan Hajradinović, a treće Esad Česko.



## Adem Fetahović osvojio zlato

**A**dem Fetahović, član Bokserskog kluba "Ilidža" osvojio je zlatnu medalju na Dvadesetom međunarodnom turniru u boks "Zlatna mimoza" koji je održan u Herceg Novom prošlog mjeseca.

U velikoj konkurenciji gdje je nastupilo 20 država Adem Fetahović je zabilježio dvije pobjede gdje je u finalnom meču pobjedio predstavnika Kazahstana 3:0.

Adem Fetahović proglašen je za najboljeg boksera turnira .

Adema Fetahovića i Džemala Bošnjaka, boksera BK "Ilidža" očekuje nastup u junu mjesecu na Evropskim igrama u Baku-Azerbejdžan i nastup na Svjetskom seniorskom prvenstvu u septembru u Dohi - Katar, koji će biti kvalifikacija za olimpijske igre 2016. u Brazilu.

## Takmičenje učenika u odbojci, košarci i fudbalu

**N**akon kvalifikacionih utakmica u kojim su se takmičili osnovaca iz 10 osnovnih škola sa područja općine Ilidža, a u organizaciji i pod pokroviteljstvom Općine Ilidža u KSIRC Ilidža, 29. aprila 2015. godine odigrane su finalne utakmice općinskog takmičenja osnovnih škola u odbojci za djevojčice, a košarci i fudbalu za dječake. U odbojci prvo mjesto osvojila je ekipa Prve osnovne škole koja je u finalu pobijedila ekipu Pete osnovne škole kojoj je pripalo drugo mjesto, a teća je bila ekipa Devete osnovne škole. U košarci prvo mjesto osvojili su učenici Prve osnovne škole, drugo Četvrte i treće košarkaši Pete osnovne škole. Učenici Pete osnovne škole prvaci su u fudbalu, drugi Prve osnovne škole i treći učenici Četvrte osnovne škole. Pobjednicima su uručene medalje i pehari.





Na osnovu člana 3. Pravilnika o utvrđivanju uslova, kriterija i postupka za izbor najljepšeg dvorišta i balkona sa cvijetnim aranžmanom , Broj:16-22-1977/15 od 06.05.2015. godine, a u cilju očuvanja tradicije ilidžanskih cvijetnih bašći i parkova, podizanja svijesti građana o značaju uređenja i brige o sopstvenom dvorištu, ulici, mjestu i njegovoj čistoći, očuvanju životne sredini, a što će doprinijeti i boljoj turističkoj ponudi, Općinski načelnik objavljuje:

## JAVNI POZIV ZA IZBOR NAJLJEPŠEG DVORIŠTA I BALKONA SA CVIJETNIM ARANŽMANOM NA PODRUČJU OPĆINE ILIDŽA

### I

Pozivamo sve zainteresovane građane da prijave svoja dvorišta i balkone na takmičenje za izbor najljepšeg dvorišta i balkona sa cvijetnim aranžmanom na općini Ilidža.

Prijaviti se mogu svi zainteresovani građani koji imaju prebivalište na području općine Ilidža.

### II

Odluku o izboru najljepšeg dvorišta i balkona donosi Općinski načelnik na prijedlog Komisije koju će imenovati u tu svrhu, a koja će običi prijavljena dvorišta i balkone, sačiniti foto-dokumentaciju i ocjeniti ih prema sljedećim kriterijima:

- \* Održavanje i urednost dvorišta – balkona;
- \* Prostorni odnosi sadržaja u dvorištu – na balkonu;
- \* Uloženi trud, izbor i njegovanje biljaka, poštivanje tradicije i elemenata našeg podneblja;
- \* Ukupni estetski dojam.

### III

Za najljepše dvorište i balkon dodjelit će se po tri nagrade: prva, druga i treća u sljedećim iznosima:  
za dvorište: za balkon

I nagrada 500 KM I nagrada 300 KM

II nagrada 400 KM II nagrada 200 KM

III nagrada 300 KM III nagrada 100 KM

### IV

Svoje prijave možete poslati putem prijavnog obrasca kojeg možete preuzeti sa web stranice Općine: [www.opcinailidza.ba](http://www.opcinailidza.ba), u prostorijama MZ i info desku (šalter sala) Općine Ilidža.

Prijava treba da sadrži:

1. Ime i prezime;
2. Tačnu adresu, kontakt telefon ili e-mail adresu;
3. Za koju kategoriju natjecanja se prijavljuje (dvorište, balkon).

Zahtjevi se predaju putem pošte , na protokolu Općine Ilidža, ulica Butmirska cesta broj 12, sa naznakom za javni poziv za izbor najljepšeg dvorišta i balkona ili putem e-mail adrese [ilidzaturizam@gmail.com](mailto:ilidzaturizam@gmail.com)

Javni poziv ostaje otvoren do 11.06.2015. godine.

Sve dodatne informacije mogu se dobiti u Službi za privredu i turizam Općine Ilidža , soba 325, kontakt osob Sitnić Indira i Prašević Adel, telefoni 033 775 755, 775 754.

Želja nam je da bar na trenutak istaknemo u prvi plan ljude koji su odlični primjeri kako neko ličnim angažovanjem može doprinijeti da se njihov najbliži, komšije i slučajni prolaznici osjećaju prijatnije, a samim tim budu i mnogo raspoloženi da se podjele ljepotu sa drugima.

**ZAHVALJUJEMO NA VAŠIM PRIJAVAMA I UČESTVOVANJU U OVOJ AKCIJI JER TIME DOPRINOSITE LJEPOTI I UGODNOJ ŽIVOTNOJ SREDINI, VJERUJUĆI DA ĆE UČESNICI SA OVOG TAKMIČENJA PORED NAGRADA PONIJETI I POZITIVNE EMOCIJE I ENERGIJU.**

OPĆINSKI NAČELNIK  
Prof.dr. Senaid Memić